

Tak benar saya tutup ruang kritikan, kata Najib
The Malaysian Insider
August 18, 2015
Oleh Hasbullah Awang Chik

Datuk Seri Najib Razak hari ini menafikan beliau menutup ruang kritikan dan sanggahan terhadap kerajaan sebaliknya berkata, ia harus dibuat secara adil dan seimbang.

Perdana menteri berkata, generasi muda perlu sedar kritikan harus dilakukan secara berhemah.

Begitu juga, katanya, jika ada perkara baik yang dilakukan kerajaan, ia wajar mendapat pujian.

"Saya cuma mahukan generasi muda bersikap adil dalam membuat penilaian dan sanggahan. Tidak benar sebagai pemimpin saya menutup sama sekali ruang kritikan dan sanggahan.

"Suara rakyat akan saya santuni. Suara generasi muda akan saya dengar dan hormati," katanya ketika berucap merasmikan Seminar Antarabangsa Wasatiyah 2015 di Bangi hari ini.

Najib berkata menjadi harapannya generasi muda pada hari ini tidak sewenang-wenangnya menjadi pembawa berita Malaysia sedang menuju jalan songsang dari aspek ekonomi mahupun politik.

Katanya, walaupun terdapat perbezaan pandangan, keamanan negara demi mencapai kepentingan politik yang singkat tidak wajar diperjudikan.

"Kita boleh berbeza pandangan namun ia mestilah dilakukan dalam keadaan saling hormat dan tidak mencemarkan nama baik negara dan agama.

"Selaras niat dan maksud wasatiyah, mungkin kita perlu mengambil sikap seimbang dalam menyanggah kerajaan dan pimpinan.

"Yang mana tidak baik, wajar disanggah dan ditegur. Namun begitu, jika ada aspek yang baik, jangan malu dan duka untuk mengangkatnya sebagai sesuatu yang baik dan membawa manfaat kepada rakyat," katanya. – 18 Ogos, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/tak-benar-saya-tutup-ruang-kritikan-kata-najib>